

Tatararaa Pipiria

IOANE 6, 51-56

51. O vau te pāne ora tei pou mai mai te raì, o tē àmu i teie nei pāne, e tiā ia i te oraraa ; ta ù pāne e horoà atu, o to ù ia tino, ta ù ia e horoà ei ora no te to ao.

52. Ua mārō anaè iho ra te âti luta rātou rātou iho, ua nā ô aè ra : E aha teie taata e tiā ai ia horoà i to na tino e àmu.

53. Ua parau mai ra letu ia rātou : Amene, amene, e parau atu vau ia òutou : Ia òre òutou ia àmu i te tino o te Tamaiti a te taata nei, e ia òre hoì ia inu i to na toto, aore ia e ora i roto ia òutou.



"Te àmu i to ù tino e te inu i to ù toto, e ora mure òre to na..."
(Paroita Maupiti 1986)

54. Tē àmu i to ù tino e tē inu to ù toto, e ora mure òre to na, e na ù o ia e faatià faahou ia tae i te mahana hopeà ra.

55. E māa mau to ù tino, e e inu mau to ù toto.

56. Tē àmu i to ù tino, e tē inu i to ù toto, e tiā ia i te àtiraa mai ia ù, e e tiā hoì au i te àtiraa atu ia na.

Te ìrava i manaòhia mai ei haaferuriraa ia tātou i teie mahana, teie ia ìrava 54 : **Tē àmu i to ù tino e tē inu i to ù toto, e ora mure òre to na, e na ù o ia e faatià faahou ia tae i te mahana hopeà ra.**

I mua i teie huru parau ta letu, e riro tātou i te maere e i te parau atoà mai te mau âti luta e : **E aha teie taata e tiā ai ia horoà i to na tino e àmu.**

Te taata hoì e àmu i te tino o te tahi atu taata, e parauhia ia i te taehae, aore ra i te àmu taata. Teie mau ānei ta letu e hinaaro nei i teie feiā e faaroo atu nei i ta na mau haapiiraa. E te onono nei ā o letu i te parauraa atu e : **Ia òre òutou ia àmu i to ù tino, e ia òre ia inu i to ù toto, aita e ora e roaa ia òutou ; te taata rā e àmu i to ù tino e tē inu i to ù toto, e ora mure òre to na.**

Mai te peu e, teie ihoā te auraa o te parau a letu, mai te peu e, teie ihoā to na hinaaro, ia àmu tātou ia na, a tae hoì tātou te taata o teie tau e. Ua 2 000 matahiti i teie nei to letu poheraa. Na hea paì ia tatou e ora atoà ai, na hea tatou te hui taata o teie tau tei tupu atoà mai te hinaaro e àmu i to na tino e e inu hoì i to na toto. Ua faufaa òre paha ia teie rahiraa haapiiraa, aore ra, aita ihoā i faataahia no tātou, no te mau taata noa rā i to na tau. Te auraa ra, te taiò noa nei tātou e te faaroo noa nei i te hoè àamu, no te tahi taata manaò huru ê rii, i te tahi tau, i te tahi fenua ātea roa i to tātou, i roto hoì i te tahi nūnaa tei parauhia e nūnaa Ìteraera.

Mai te peu e, teie ihoā te auraa ra, e parau tahito ia teie. E mai te mau parau tahito atoà, ua riro ia ei mea faufaa òre. Eita atu ra e tiā ia parau tātou e, e èvaneria, oia hoì e parau âpi òaòà. Ahiri, e roaa ānei te òaòà i te tahi parau tahito. Eita, no te mea te parau âpi anaè tē faaòaòà i te taata.

E o tātou i teie tau, e nā hea ia to tātou òaòaraa e noaa ai, inaha, te rāveà e parauhia nei e, e roaa te ora hope òre oia hoì te àmuraa i teie taata ia letu, e te inuraa i to na toto, ua mairi ia a 2 000 matahiti i teie nei. E nā hea ia te òaòà e noaa ai mai te peu e, ua ère tātou i te rāveà hoè roa e fānaò atoà ai tātou i te ora hope òre i poroìhia mai.

Mai te peu e, te reira ihoā te auraa ra, mea

Tatararaa Pipiria

maitai aè ia tātou e tāpiri i ta tātou puta, e hoì i te fare, no te taiò i te tahi atu ā mau puta àamu.

Aita rā te taata o terā tau i maamaahia ; aita te hoè noa aè o rātou i rave i to na tino e àmu, aita hoì i rave i to na toto e inu, mai tei faatianianihia ia rātou. Te auraa ra, aita e taata i tiāturi roa ia letu no te faahiahia o to na tino e to na toto. E àamu huru ê mau teie.

E àamu mau ānei rā hoì te parau o letu, eere mau ānei o IA iho i te parau āpi òaòà no tātou atoà. Eiaha no te mea e, na tātou e faaāpi i te reira parau, mai te tahi taihaa tahito ta tātou e uiiu no te faaànaàna ia na ; eiaha atoà tātou e manaò e, na tatou e faanaho i teie parau ia riro ei parau huru au aè no tātou ia faaroo, eere roa atu. Ta tātou, te ani noa ia i te Atua e i ta na Tamaiti ia tauturu mai ia tātou i te ìte-atoà-raa i te āpi e te òaòà o ta na parau, ia heheu atoà mai rāua ia tātou i te auraa o teie mau parau, e ia faaò atoà ia tātou i roto i te faaāpiraa e te faaòàòaraa ta letu e hinaaro nei.

E te Atua e, a faaāpi mai i to mātou mata, to mātou àau e to mātou vārua, ia riro ta òe parau ei parau òaòà no mātou atoà i teie mahana, e i teie hora, e a tau noa atu.

Tē àmu i to ù tino e tē inu i to ù toto, e ora mure òre to na, e na ù o ia e faatiā faahou ia tae i te mahana hopeà.

Te manaò rahi i roto i ta tātou ìrava, teie ia : te àmu, te inu e te ora. Teie atoà te huru tātōiāraahia te ora o te taata : e àmu i te māa, e inu i te pape, e ora ia tē noaa. I te tahi aè pae, ia ère i te māa e ia ère i te pape, e pohe ia tē noaa.

Tae mai i teie vāhi, aita e parau eita e noaa i to tātou maramarama ia faataa e ia ìte i te auraa.

E aha rā teie tino e teie toto ta letu e parau nei.

E parau teie no te inai, aore ra no te iò, mai te iò o te ānimara atoà ra. E taoà faufaa te inai



on fait de la tôle!
**Ondulées ou nervurées
galvanisées ou prélaquées...**

Nous fabriquons toutes les tôles sur
mesure en 50/100 - 63/100 - 75/100
qualité, COLORSTEEL - PLASTISOL.
Prix défiant toute concurrence!
Tél. 42.83.49 (3 lignes groupées)

GUILLOUX

Tatararaa Pipiria

i roto i te oraraa o te taata, e, aita hoì e inai toto òre. E tãpaò rã te iò e te toto no te ora. Ia taa ê te toto i te iò, e pohe ia te auraa. Ia hoê rã rãua e matara ai te parau o te ora. I ô nei atoà rã tãtou e ite ai i te vãhi taa ê rii o te ora ta tãtou e taiò nei i te parau.

Ei hiòraa :

E aha to tãtou manaò i te hoê puua, aore ra te hoê puuatoro i pohe e aita e taata i haùti noa aè, aita e taata i rave noa aè te rima. E nã ô paha ia tãtou e, ua mãuà, mea nounou ia puua, inaha aita i àmuhia. Te faufaa o te puua i to na oraraa ra, ia haapohehia ia, a riro mai ai ei mãa e horoà i te ora no te taata. Ia òre rã to na pohe ia horoà i te ora, e pohe faufaa òre ia.

Teie mau atoà te parau ta letu e tohu ãtea nei. Ia òre o ia ia pohe, aita e ora e roaa mai i te taata. Ia pohe rã o ia, i reira te inai e te toto a te taata e roaa ai. Eiaha tãtou e maere i teie huru tairaa reo to letu, no te mea, te huru parau ihoã teie e faaòhipahia, mai te tau mai ã o Mõte, i roto i te mau pũpũraa tutia. I reira ra, ua riro te toto ei tapaò no te ora i horoàhia no te tamaraa hara, àreà te iò ra, ei tãpaò ia no te pũai.

Oia mau, aita o letu e fũrai nei ia tãtou ia riro ei taehae, ia ite rã tãtou e, i roto i to na pohe, te riro nei o na e te horoà nei ia na ei mãa, ei inai hoì e horoà i te ora mure òre, no te mea o IA iho te Ora mure òre.

Teie te taa-ê-raa i roto i ta letu horoàraa ia

NA e te iò puua ta tatou e àmu nei. E ora ihoã te tino i te puua, e ora tãmahana rã, e ora faaâpi noa, àreà te ora ta letu e horoà nei, e ora mure òre ia, e ora hope òre. Ua ite rã tãtou e, noa atu teie parau no te ora hope òre, aita ihoã e taata e rahi nei i te hinaaro e àmu i te tino e te inu i te toto o letu. No te aha. Eita e òre e, mai ia Toma, te fifi nei tãtou i teie mau parau no te mea eita te mata e ite, eita hoì te rima e fãfã. Eita ihoã rã e roaa ia fãfã no te mea, eere ihoã te reira te vãhi e titauhia nei ia tãtou. Te riro noa nei te tino e te toto o letu ei faahohoàraa i te huru rãveà e noaa ai ia tãtou te ora horoà noa ta to na Metua i tono mai ia NA e faaite ia tãtou nei.

Ia tũpaihia te puua, ia ite tãtou i te tino e to toto o teie puua, te nã ô nei tãtou e : **ua ahimãa tãtou, ua tãmãa tãtou, ua ora tãtou.**

Te nã ô noa mai nei te pãpai e : e horoà o letu i to na tino, e manii to na toto, e pohe o na ei ora no to te ao. Tei ia tãtou tãtai tahi te parau-atoà-raa e : **ua ora tãtou, ua tãmãa tãtou.**

Te tino e te toto o letu no tãtou, o ta na ia parau. Ia riro te reira ei mãa tumu e ei pape tumu na tãtou i te mau mahana atoà, i reira e tià ai ia tatou ia parau e : Ua ora tãtou. Ua ite tãtou e, ia hoê te tino e te toto e matara ai te parau o te ora. Ia faariro tãtou i te parau o te Metia ei mãa na tãtou, i reira teie toto e teie tino e ora ai i roto ia tãtou. Teie mau atoà te manaònaòraa tumu a Pauro, oia te imiraa i te mau rãveà atoà ia ora te



"E amu i te maa, e inu i te pape, e ora ia te noaa." (panaraa puha i Rimatara)

Tatararaa Pipiria

tino e te toto o te Metia i roto ia na. E parau itehia teie e tātou e, te māa, i roto o na i te tino e òhipa ai, i roto hoì i te tino e itehia ai to na maitai e to na ìno ; ia òre te parau a letu ia òhipa atoà i roto ia tātou, i roto i to tātou oraraa mai te māa ra te huru, e aha ia tātou e ìte ai i te huru ora ta na e horoà mai.

Teiei te parau āpi òaòà. E ìmi i teie ìnai e teie toto e parauhia nei o letu, e faairi o ia na ei māa, **e ora mure òre to roto ia na**, òre noa atu ā to tātou mata e hiò, òre noa atu ā to tātou rima e tāpeà. Te tino e te toto ta letu e parau nei, eere na te niho e hohoni, eere hoì i roto i te vaha e tuu ai, no te mea e māa te reira no te tuu i roto i te aau, no te faaètaèta i to tātou vārua, ia ànaànaea faahou mai o ia e ia hiroà i te ora ta letu e tautoo noa nei i te faaite ia tātou i te èà.

Ia àmu tātou i te iò o letu, ia inu hoì i to na toto, oia hoì, i te mahana e hinaaro ai tātou, e i te mahana e fārii atoà ai tātou i te faairi i ta na parau ei māa e horoà mai i te ora e ei pape e horoà mai i te pūai āpi i to tātou vārua, i taua mahana ra e àraàra ai to tātou mata i nià i te ora ta te Atua i hinaaro ei tuhaa na tatou.

Te feiā atoà i hinaaro mau i teie ora, e ora

mau ia rātou. Tei òre i hinaaro ra, e pārahi a ia rātou i roto i te ìmiraa hope òre. Te taata i hinaaro i te Metia ra, e faaea o ia i te perehahu, e faaea i te pātōtō i te pae àtau e i te pae àui, no te mea, te vahi tei reira to na ora, te vāhi atoà ihoa ia ta na e tāpapa.

E àmu tātou i te tino o letu mai te taata pohe poia, e inu i to na toto mai te taata tei pūhā roa. Eiaha e àmu i te vāhi taata, i te mea ta tatou e puhi, aore ra ta tatou e pihaè i te vāhi moèmoè.

E tano te mau huru vaha atoà e àmu i te tino e e inu i te toto o letu, eita rā te mau huru òpū atoà e fārii i te reira ei māa, eita hoì te mau huru vārua atoà e òaòà i taua māa ra. Oia mau, eita o letu e riro ei māa e faaāpi e e faaòaòà i te mau huru taata atoà, riro noa atu ā o ia ei ora hoè roa no to te ao, riro noa atu ā o ia ei maa e horoà i te òaòà mure òre, e parau noa mai ā o ia e nana iho e haere roa mai e tiaì ia tātou i te mahana tià-faahou-raa. E faaitoito, eiaha ia maenuenu te vārua i te ìmiraa i te tino e te toto o te Metia te Tamaiti a te Atua.

Turo a RAAPOTO



SHRM POLYNÉSIE • SHR TOURISTIQUE

GRUPE SHRM

Services **H**ôtellerie, de
Restauration et de **M**anagement -
Polynésie.

Services **H**ôtellerie
et de **R**estauration **T**ouristiques.



BP 50.352 PIRAE - TAHITI - Polynésie Française Allée Pierre Loti Titiro - Tél. 42.81.29

**VEA POROTETANI - Bulletin de l'E.E.P.F - diffusé gratuitement à
6 000 exemplaires - Réalisation : SCOOP 43.54.56 - Impression SIT**